



土岐文庫
文庫17
W101
1

上



文章 17
W101
1

詩文見于錄者豈亡之邪使應物而無死其所爲不當止此以應物爲終於吳郡之後則禹錫之所舉老猶無恙也蓋不可得而考也新唐書文藝傳稱應物有文在人間史逸其傳故不錄予既愛其詩因考次其平生行義官代皆有憑籍始終可槩見如此恨史官編摩疎陋耳嗟夫應物崎嶇身閱盛衰之變晚折節學問今其詩往往及治道而造理精深士固有悔而能復厄而後奇者如應物而以自表見於後世豈偶然哉

昭和三十年二月一日
土佐善吉氏寄

010185189010



韋蘇州詩集

五言古詩

擬古十二首

辭君遠行邁飲此長恨端已謂道里遠如何中險
艱流水赴大壑孤雲還暮山無情尚有歸行子何
獨難驅車背鄉園朔風卷行迹嚴冬霜斷肌日入
不遑息憂歡客髮變寒暑人事易中心君詎知冰
玉徒貞白

黃鳥何關關幽蘭亦靡靡此時深閨婦日照紗窗
裏娟娟雙青娥微微啓玉齒自惜桃李年誤身遊

俠子無事久離別不知今生死

峨峨高山巔浼浼青川流世人不自悟馳謝如驚
颯百金非所重厚意良難得旨酒親與朋芳年樂
京國京城繁華地軒蓋凌晨出垂揚十二衢隱映
金張室漢宮南北對飛觀齊白日游泳屬芳時平
生自云畢

綺樓何氛氲朝日正杲杲四壁含清風丹霞射其
牖玉顏上哀嚙絕耳非世有但感離恨情不知誰
家婦孤雲忽無色邊馬爲迴首曲絕碧天高餘聲
散秋草徘徊帷中意獨夜不堪守思逐朔風翔一

去千里道

嘉樹藹初綠靡蕪吐幽芳君子不在賞寄之雲路
長路長信難越惜此芳時歇孤鳥去不還緘情向
天末

月滿秋夜長驚鳥號北林天河橫未落斗柄當西
南寒蛩悲洞房好鳥無遺音商飈一夕至獨宿懷
重衾舊交日千里隔我浮與沉人生豈草木寒暑
移此心

酒星非所酌月桂不爲食虛薄空有名爲君長歎
息蘭蕙雖可懷芳香與時息豈如凌霜葉歲暮藹

顏色折柔將有贈延意千里客草木知賤微所貴
寒不易

神州高爽地遐瞰靡不通寒月野無綠寥寥天宇
空陰陽不停馭貞脆各有終汾沮何鄙儉考槃何
退窮反志解牽跼無爲尚勞躬美人奪南國一笑
開芙蓉清鏡理容髮褰簾出深重艷曲呈皓齒舞
羅不堪風慊慊情有待贈芳爲我容可嗟青樓月
流影君帷中

春至林木變洞房夕含清單居誰能裁好鳥對我
鳴良人久燕趙新愛移平生別時雙鴛綺留此干
恨情碧草生舊迹綠琴歇芳聲思將魂夢歡反側
寐不成攬衣迷所次起望空前庭孤影中自惻不
知雙涕零

秋天無留景萬物藏光輝落葉隨風起愁人獨何
依華月屢圓缺君還浩無期如何雲雨絕一去音
問違

有客天一方寄我孤桐琴迢迢萬里隔託此傳幽
音冰霜中自結龍鳳相與吟絃以明直道漆以固
交深

白日淇上沒空閨生遠愁寸心不可限淇水長悠

悠芳樹正妍鬱春禽自相求徘徊東西廂孤妾誰
與儔年華逐絲淚一落俱不收

雜體五首

沉沉匣中鏡爲此塵垢蝕輝光何所如月在雲中
黑南金既雕錯輦帶共輝飾空存鑒物明坐使妍
蚩惑美人竭肝膽思照冰玉色自非磨瑩工日日
空歎息

古宅集祆鳥群號枯樹枝黃昏窺人室鬼物相與
期居人不安寢搏擊思此時豈無鷹與鷂飽肉不
肯飛既乖逐鳥節空養凌雲姿孤負肉食恩何異

城上鳴

春羅雙鴛鴦出自寒夜女心精煙霧色指歷千萬
緒長安貴豪家妖艷不可數裁此百日功惟將一
朝舞舞罷復裁新豈思勞者苦

同聲自相應體質不必齊誰知賈人鐸能使大樂
諧鏗鏘發宮徵和樂變其哀人神既昭享鳳鳥亦
下來豈非至賤物一奏升天階物情苟有合莫問
玉與泥

碌碌荆山璞卞和獻君門荆璞非有求和氏非有
恩所獻知國寶至公不待言是非吾欲默此道今

豈存

與友生野飲效陶體

攜酒花林下前有千載墳於時不共酌奈此泉下
人始自玩芳物行當念徂春聊舒遠世蹤坐望還
山雲且遂一歡笑焉知賤與貧

效陶彭澤

霜露悴百草時菊獨妍華物性有如此寒暑其奈
何掇英泛濁醪日入會田家盡醉茅簷下一生豈
在多

大梁亭會李四栖梧作

梁王昔愛才千古化不泯至今蓬池上遠集八方
賓車馬平明合城郭滿埃塵逢君一相許豈要平
生親入仕三十載如何獨未伸英聲久籍籍臺閣
多故人置酒發清彈相與樂佳辰孤亭得長望白
日下廣津富貴良可取竭來西入秦秋風旦夕起
安得客梁陳

賈常侍林亭燕集

高賢侍天階跡顯心獨幽朱軒鶩關右池館在東
周繚繞接都城氤氳望嵩丘群公盡詞客方駕永
日遊朝旦氣候佳逍遙寫煩憂綠林靄已布華沼

澹不流凌露摘幽草涉煙翫輕舟圓荷既出水廣
廈可淹留放神遺所拘觥罰屢見酬樂燕良未極
安知有沉浮醉罷各云散何當復相求

移疾會詩客元生與釋子法朗因貽諸

曹祠

對此嘉樹林獨有戚戚顏抱瘵知曠職淹旬非樂
閑釋子來問訊詩人亦扣關道同意暫遣客散疾
徐還園徑自幽靜玄蟬噪其間高窗瞰遠郊暮色
起秋山英曹幸休暇恨恨心所攀

慈恩伽藍清會

素友俱薄世屢招清景賞鳴鐘悟音聞宿昔心已

往重門相洞達高宇亦遐朗嵐嶺曉城分清陰夏
條長氤氛芳臺馥蕭散竹池廣平荷隨波泛迴颺
激林響蔬食遵道侶泊懷遺滯想何彼塵昏人區
區在天壤

扈亭西陂燕賞

杲杲朝陽時悠悠清陂望嘉樹始氤氳春遊方浩
蕩况逢文翰侶愛此孤舟漾綠埜際遙波橫雲分
壘嶂公堂日爲倦幽襟自茲曠有酒今滿盈願君
盡弘量

西郊燕集

濟濟衆君子高宴及時光
群山靄遐矚綠埜布熙
陽列坐遵曲岸披襟襲
蘭芳野庖薦嘉魚激澗
泛羽觴衆鳥鳴茂林綠
草延高岡盛時易徂謝
浩思坐飄颺眷言同心
友茲遊安可忘

春宵燕萬年吉少府中孚南館

始見斗柄迴復茲霜月
霽河漢上縱橫春城夜
迢遞賓筵接時彥樂燕
凌芳歲稍愛清觴滿仰
歎高文麗欲去返郊扉
端爲一歡滯

滁州園池燕元氏親屬

日暮遊清池疎林羅高
天餘綠飄霜露夕氣變
風

煙水門架危閣竹亭列
廣筵一展私姻禮屢歎
芳樽前感往在茲會傷
離屬頽年明晨復云去
且願此留連

郡樓春燕

衆樂雜軍鞞高樓邀上
客思逐花光亂賞餘山
景夕爲郡訪凋瘵守程
難損益聊假一杯歡暫
忘終日迫

南塘泛舟會元六昆季

端居倦時燠輕舟泛迴
塘微風飄襟散橫吹繞
林長雲澹水容夕雨微
荷氣涼一寫惰勤意寧
用訢

華觴

郡齋雨中與諸文士燕集

兵衛森畫戟燕寢凝清香海上風雨至逍遙池閣
涼煩痾近消散嘉賓復滿堂自慙居處崇未覩斯
民康理會是非遣性達形迹忘鮮肥屬時禁蔬果
幸見嘗俯飲一杯酒仰聆金玉章神歡體自輕意
欲凌風翔吳中盛文史群彥今汪洋方知大藩地
豈曰財賦彊

奉同郎中使君郡齋雨中宴集

好鳥依嘉樹飛雨灑高城况與數君子列座分兩
楹文雅一何麗林堂含餘清我公未歸朝遊子不
待晴白雲帝鄉遠滄江楓葉鳴拜手欲無言零淚
如酒傾寸心已摧折別離方骨驚安得凌風翰肅
肅賓天京

軍中冬燕

滄海已云晏皇恩猶念勤式燕徧恒秩柔遠及斯
人茲邦實大藩伐鼓軍樂陳是時冬服成戎士氣
益振虎竹謬朝寄英賢降上賓旋罄周旋禮愧無
海陸珍庭中丸劒闌堂上歌吹新光景不知晚觥
酌豈言頻單醪昔所感大釀况同忻顧謂軍中士

仰荅何由申

司空主簿琴席

煙華方散薄蕙氣猶含露澹景發清琴幽期默玄
悟留連白雪意斷續迴風度掩抑雖已終忡忡在
幽素

晦日處士叔園林燕集

遽看萸葉盡坐闕芳年賞賴此林下期清風滌煩
想始萌動新煦佳禽發幽響嵐嶺對高齋春流灌
蔬壤樽酒遺形迹道言屢開獎幸蒙終夕歡聊用
稅歸鞅

與韓庫部會王祠曹宅

閑門蔭堤柳秋渠含夕清微風送荷氣坐客散塵
纓守默共無恡抱冲俱寡營良時頗高會琴醞共
開情

贈李儋

絲桐本異質音響合自然吾觀造化意二物相因
緣誤觸龍鳳嘯靜聞寒夜泉心神自安宅煩慮頓
可捐何因知久要絲白漆亦堅

贈盧嵩

百川注東海東海無虛盈泥滓不能濁澄波非益

清恬然自安流日照萬里晴雲物不隱象三山共
分明奈何疾風怒忽在基柱傾海水雖無心洪濤
亦相驚怒號在倏忽誰識變化情

寄馮著

春雷起萌蟄土壤日已疎胡能遭盛明才俊伏里
閭偃仰遂真性所求唯斗儲披衣出茅屋盥漱臨
清渠吾道亦自適退身保玄虛幸無職事牽且覽
案上書親友各馳騫誰當訪弊廬思君在何夕明
月照廣除

將往江淮寄李十九儋

燕燕東向來文鷁亦西飛如何不相見羽翼有高
卑徘徊到河洛華屋未及窺秋風飄我行遠與淮
海期回首隔煙霧遥遥兩相思陽春自當返短翮
欲追隨

寄盧庾

悠悠遠離別分此歡會難如何兩相近反使心不
安亂髮思一櫛垢衣思一浣豈如望友生對酒起
長歎時節異京洛孟冬天未寒廣陵多車馬日夕
自遊盤獨我何耿耿非君誰爲歡

發廣陵留上家兄兼寄上長沙

將違安可懷宿戀復一方家貧無舊業薄宦各飄
颺執板身有屬淹時心恐惶拜言不得留聲結淚
滿裳漾漾動行舫亭亭遠相望離晨苦須臾獨往
道路長蕭條風雨過得此海氣涼感秋意已違况
自結中腸推道固當遣及情豈所忘何時共還歸
舉翼鳴春陽

初發揚子寄元校書

悽悽去親愛泛泛入煙霧
桴棹洛陽人殘鐘廣陵樹
今朝此爲別何處還相遇
世事波上舟
汭安得住

淮上即事寄廣陵親故

前舟已渺渺欲渡誰相待
秋山起暮鍾楚雨連滄海
風波離思滿宿昔容鬢改
獨鳥下東南廣陵何處在

經少林精舍寄都邑親友

息駕依松嶺高閣一攀緣
前瞻路已窮既詣喜更延
出巘聽萬籟入林濯幽泉
鳴鍾生道心暮磬空雲煙
獨往雖暫適多累終見牽
方思結茅地歸息期暮年

城中臥疾知閻薛二子屢從邑令飲因以

贈之

車馬日蕭蕭胡不在我廬方來從令飲臥病獨何
如秋風起漢皋開戶望平蕪即此稀音素焉知中
密疎渴者不思火寒者不求水人生羈寓時去就
當如此猶希心異迹眷眷存終始

聽嘉陵江水聲寄深上人

鑿崖泄奔湍稱古神禹跡夜喧山門店獨宿不安
席水性自云靜石中本無聲如何兩相激雷轉空
山驚貽之道門舊了此物我情

高陵書情寄三原盧少府

直方難爲進守此微賤班開卷不及顧沉埋案牘
間兵凶久相踐徭賦豈得閒促戚下可哀寬政身
致患日夕思自退出門望故山君心儻如此攜手
相與還

同長源歸南徐寄子西子烈有道

東洛何蕭條相思邈遐路策駕復誰遊入門無與
晤還因送歸客達此緘中素屢睽心所歡豈得顏
如故所歡不可睽嚴霜晨淒淒如彼萬里行孤妾
守空閨臨觴一長歎素欲何時諧

同德精舍養疾寄河南兵曹東廳掾

蘇州詩集
逍遙東城隅雙樹寒蔥蒨廣庭流華月高閣凝餘
霰杜門非養素抱疾阻良讌孰謂無他人思君歲
云變官曹亮先忝陳躅慙俊彥豈知晨與夜相代
不相見緘書問所如酬藻當芬紉

同德寺雨後寄元侍御李博士

川上風雨來須臾滿城闕岿青蓮界蕭條孤興
發前山遽已淨陰靄夜來歇喬木生夏涼流雲吐
華月巖城自有限一水非難越相望曙河遠高齋
坐超忽

使雲陽寄府曹

夙駕祇府命冒炎不遑息百里次雲陽閭閻問漂
溺上天屢憊氣胡不均寸澤仰瞻喬樹顛見此洪
流跡良苗免漂沒蔓草生宿昔頽墉滿故墟返喜
將安宅周旋涉塗潦側峭緣溝脉仁賢憂斯民賤
子甘所役公堂衆君子言笑思與覲

過扶風精舍舊居簡朝宗巨川兄弟

佛刹出高樹晨光閭井中年深念陳跡迨此獨忡
忡零落逢故老寂寥悲草虫舊宇多改構幽篁延
本叢栖止事如昨芳時去已空佳人亦攜手再往
今不同新文聊感舊想子意無窮

贈馮著

契闊仕兩京念子亦飄蓬方來屬追往十載事不
同歲晏乃云至微褐還未充慘悽遊子情風雪自
關東華觴發懽顏嘉藻播清風始此盈抱恨曠然
一夕中善蘊豈輕售懷才希國工誰當念素士零
落歲華空

對雨寄韓庫部協

颯至池館涼靄然和曉霧蕭條集新荷氛氲散高
樹閑居興方淡默想心已屢暫出仍濕衣况君東
城住

寄子西

夏景已難度懷賢思方續喬樹落疎陰微風散煩
燠傷離在芳札忻遂見心曲藍上舍已成田家雨
新足託鄰素多欲殘秩猶見束日夕上高齋但望
東原綠

對雪贈徐秀才

靡靡寒欲收靄靄陰還結晨起望南端千林散春
雪妍光屬瑤階亂緒凌新節無爲掩扉臥獨守袁
生轍

西郊遊宴寄贈邑僚李巽

升陽暖春物置酒臨芳席高宴闕英僚衆賓寡歡
懌是時尚多壘板築興頽壁羈旅念越疆領徒方
祇役如何嘉會日當子憂勤夕西郊鬱已茂春嵐
重如積何當返徂雨雜英紛可惜

休沐東還胄貴里示端

宦遊三十載田野久已疎休沐遂茲日一來還故
墟山明宿雨霽風暖百卉舒泓泓野泉潔熠熠林
光初竹木稍摧翳園場亦荒蕪俯驚鬢已衰周覽
昔所娛存沒惻私懷遷變傷里閭欲言少留心中
復畏簡書世道良自退榮名亦空虛與子終攜手

歲晏當來居

朝請後還邑寄諸友生

宰邑分甸服夙駕朝上京是時當暮春休沐集友
生抗志青雲表俱踐高世名尊酒且懽樂文翰亦
縱橫良遊昔所希累讌夜復明晨露含瑤琴夕風
殞素英一旦遵歸路伏軾出京城誰言再念別忽
若千里行閑閣寡誼訟端居結幽情況茲晝方永
展轉何由平

澧上西齋寄諸友

絕岸臨西野曠然塵事遙清川下灑迤茅棟上峇

堯翫月愛佳夕望山屬清朝俯砌視歸翼開衿納
遠颺等陶辭小秩効朱方負樵閒遊忽無累心跡
隨景超明世重才彥雨露降丹霄群公正雲集獨
予欣寂寥

獨遊西齋寄崔主簿

同心忽已別昨事方成昔幽徑還獨尋綠苔見行
跡秋齋正蕭散煙水易昏夕憂來結幾重非君不
可釋

秋集罷還途中作謹獻壽春公黎公

束帶自衡門奉命宰王畿君侯枉高鑒舉善掩瑕

疵斯民本已安工拙兩無施何以酬明德歲晏不
磷緇時節乃來集欣懷方載馳平明大府開一得
拜光輝溫如春風至肅若嚴霜威群屬所載瞻而
忘倦與飢公堂燕華筵禮罷復言辭將從平門道
憇車澧水湄山川降嘉歲草木蒙潤滋孰云還本
邑懷戀獨遲遲

閒居贈友

補吏多下遷罷歸聊自度園廬既蕪沒煙景空澹
泊閑居養痾瘵守素甘葵藿顏鬢日衰耗冠帶亦
寥落青苔已生路綠筠始分籜夕氣下遙陰微風

動疎薄草玄良見，誚杜門無請託。非君好事者，誰來顧寂寞。

四禪精舍登覽悲舊宮朝宗巨川兄弟

蕭散人事憂迢遞，古原行春風日已暄。百草亦復生，躋閣謁金像。攀雲造禪扃，新景林際曙。雜花川上明，徂歲方緬邈。陳事尚縱橫，溫泉有佳氣。馳道指京城，攜手思故日。山河留恨情，存者邈難見。去者已冥冥，臨風一長慟。誰畏行路驚。

善福閣對雨寄李儋幼遐

飛閣凌大虛，晨躋鬱崢嶸。驚飈觸懸檻，白雲冒層甍。大陰布其地，密雨垂八紘。仰觀固不測，俯視但冥冥。感此窮秋氣，沉鬱命友生。及時策高步，羈旅遊帝京。聖朝無隱才，品物俱昭形。國士秉繩墨，何以表堅貞。寸心東北馳，思與一會并。我車夙已駕，將逐晨風征。郊塗住成淹，默默阻中情。

寺居獨夜寄崔主簿

幽人寂不寐，木葉紛紛落。寒雨暗深更，流螢度高閣。坐使青燈曉，還傷夏衣薄。寧知歲方晏，離居更蕭索。

九日澧上作寄崔主簿倬二李端繫

淒淒感時節望望臨澧涘翠嶺明華秋高天澄遙
滓川寒流愈迅霜交物初委林葉索已空晨禽迎
颺起時菊乃盈泛濁醪自爲美良遊雖可娛殷念
在之子人生不自省營欲無終已孰能同一酌陶
然冥斯理

西郊養疾聞暢校書有新什見贈久佇不
至先寄此詩

養病愜清夏郊園敷卉木窗夕含澗涼雨餘愛筠
綠披懷始高詠對琴轉幽獨仰子遊羣英吐詞如
蘭馥還聞枉嘉藻佇望延昏旭唯見草青青閉門
澧水曲

澧上寄幼遐

寂寞到城闕惆悵返柴荆端居無所爲念子遠徂
征夏晝人已息我懷獨未寧忽從東齋起兀兀尋
澗行罨罍叢榛密披翫孤花明曠然西南望一極
山水情周覽同遊處逾恨阻音形壯圖非旦夕君
子勤令名勿復久留燕蹉跎在北京

善福精舍示諸生

湛湛嘉樹陰清露夜景沉悄然羣物寂高閣似陰
岑方以玄默處豈爲名跡侵法妙不知歸獨此抱

冲襟齋舍無餘物陶器與單衾諸生時列坐共愛
風滿林

晚出澧上贈崔都水

臨流一舒嘯望山意轉延隔林分落景餘霞明遠
川首起趣東作已看耘夏田一從民里居歲月再
徂遷昧質得全性世名良自牽行欣攜手歸聊復
飲酒眠

開元觀懷舊寄李二韓二裴四兼呈崔郎
中嚴家令

宿昔清都燕分散各西東車馬行跡在霜雪竹林

空方軫故物念誰復一尊同聊披道書暇還此聽
松風

春日郊居寄萬年吉少府中孚三原少府
偉夏侯校書審

谷鳥時一轉田園春雨餘光風動林早高窗照日
初獨飲澗中水吟詠老氏書城闕應多事誰憶此
閒居

還闕首途寄精舍親友

休沐日云滿冲然將罷觀嚴車候門側晨起正朝
冠山澤含餘雨川澗注驚湍攬轡遵東路回首一

長嘆居人已不見高閣在林端

秋夜南宮寄澧上弟及諸生

暝色起煙閣沉抱積離憂况茲風雨夜蕭條梧葉
秋空宇感涼至頽顏驚歲周日夕遊闕下山水憶
同遊

塗中書情寄澧上兩弟因送二甥却還

華簪豈足戀幽林徒自違遙知別後意寂寞掩郊
扉回首昆池上更羨爾同歸

寄柳州韓司郎中

達識與昧機智殊跡同靜於焉得攜手屢賞清夜
景蕭灑陪高詠從容羨華省一逐風波遷南登桂
陽嶺舊里門空掩歡遊事皆屏悵望城闕遙幽居
時序永春風吹百卉和煦變閭井獨悶終日眠篇
書不復省唯當望雨露霑子荒遐境

寄令狐侍郎

三山有瓊樹霜雪色逾新始自風塵交中結綢繆
姻西掖方掌誥南宮復司春夕燕華池月朝奉玉
階塵衆寶歸和氏吹噓多俊人羣公共然諾聲問
邁時倫孤鴻既高舉燕雀在荆榛翔集且不同豈
不欲殷勤一旦遷南郡江湖渺無垠寵辱良未定

君子豈緇磷寒暑已推斥別離生苦辛非將會面
目書札何由申

園林晏起寄昭應韓明府盧主簿

田家已耕作井屋起晨煙園林鳴好鳥閑居猶獨
眠不覺朝已晏起來望青天四體一舒散情性亦
忻然還復茅簷下對酒思數賢束帶理官府簡牘
盈目前當念中林賞覽物遍山川上非遇明世庶
以道自全

寄大梁諸友

分竹守南譙弭節過梁池雄都衆君子出餞擁河
湄燕謹始云洽方舟已解維一爲風水便但見山
川馳昨日次睢陽今夕宿符離雲樹愴重疊煙波
念還期相敦在勤事海內方勞師

新秋夜寄諸弟

兩地俱秋夕相望共星河高梧一葉下空齋歸思
多方用憂人瘼况自抱微疴無將別來近顏鬢已
蹉跎

郊園聞蟬寄諸弟

去歲郊園別聞蟬在蘭省今歲臥南譙蟬鳴歸路
永夕響依山郭餘悲散秋景緘書報此時此心方

耿耿

寄中書劉舍人

雲霄路竟別中年跡暫同比翼趨丹陛連騎下南
宮佳詠邀清月幽賞滯芳叢迨予一出守與子限
西東晨露方蒼蒼離抱更冲冲忽覩九天詔秉綸
歸國工玉座浮香氣秋禁散涼風應向橫門度環
珮杳玲瓏光輝恨未矚歸思坐難通蒼蒼松桂姿
想在掖垣中

郡齋感秋寄諸弟

首夏辭舊國窮秋卧滁城方知昨日別忽覺徂歲
驚高閣收煙霧池水晚澄清戶牖已淒爽晨夜感
深情昔遊郎署間是月天氣晴授衣還西郊曉露
田中行采菊投酒中昆弟自同傾簪組聊挂壁焉
知有世榮一旦居遠郡山川間音形大道庶無累
及茲念已盈

郡中對雨贈元錫兼簡陽凌

宿雨冒空山空城響秋葉沉沉暮色至淒淒涼氣
入蕭條林表散的礫荷上集夜霧着衣重新苔侵
履濕遇茲端憂日賴與嘉賓接

冬至夜寄京師諸弟兼懷崔都水

理郡無異政所憂在素飡徒令去京國羈旅當歲
寒子月生一氣陽景極南端已懷時節感更抱別
離酸私燕席云罷還齋夜方闌邃幕沉空宇孤燭
照牀單應回茲夕念寧忘故歲歡川塗恍悠邈涕
下一闌干

元日寄諸弟兼呈崔都水

一從守茲郡兩鬢生素髮新正加我年故歲去超
忽淮濱異時候了似仲秋月川谷風景溫城池草
木發高齋矚多暇惆悵臨芳物日月昧還期念君
何時歇

寄職方劉郎中

相聞二十載不得展平生一夕南宮遇聊用寫中
情端服光朝次群列慕英聲歸來坐粉闥揮筆乃
縱橫始陪文翰遊歡燕難久并子因謬忝出君爲
沉疾嬰別離寒暑過荏苒春草生故園茲日隔新
禽池上鳴郡中永無事歸思徒自盈

社日寄崔都水及諸弟群屬

山郡多暇日社時放吏歸坐閣獨成悶行塘閱清
輝春風動高柳芳園掩夕扉遙思里中會心緒悵
微微

寒食日寄諸弟

禁火暖佳辰念離獨傷抱見此野田花心思杜陵
道聯騎定何時予今顏已老

三月三日寄諸弟兼懷崔都水

暮節看已謝茲晨愈可惜風澹意傷春池寒花斂
夕對酒始依依懷人還的的誰當曲水行相思尋
舊跡

寄楊協律

吏散門閣掩鳥鳴山郡中遠念長江別俯覺座隅
空舟泊南池雨簟卷北樓風併罷芳樽燕爲愴昨

時同

郡齋贈王卿

無術謬稱簡素冷空自嗟秋齋雨成滯山藥寒始
華蕩落人皆笑幽獨歲逾賒惟君出塵意賞愛似
山家

簡怗璨

室虛多涼氣天高屬秋時空庭夜風雨草木曉離
披簡書日云曠文墨誰復持聊因遇澄靜一與道
人期

寄暢當

寇賊起東山英俊方未閑聞君多應募籍籍動京
關出身文翰場高步不可攀青袍未及解白羽插
腰間昔爲瓊樹枝今有風霜顏秋郊細柳道走馬
一夕還丈夫當爲國破敵如摧山何必事州府坐
使鬚毛斑

京師叛亂寄諸弟

弱冠遭世難二紀猶未平羈離官遠郡虎豹滿西
京上懷犬馬戀下有骨肉情歸去在何時流淚忽
霑纓憂來上北樓左右但軍營函谷行人絕淮南
春草生鳥鳴埜田間思憶故園行何當四海晏甘

與齊民耕

贈琮公

山僧一相訪吏案正盈前出處似殊致喧靜兩皆
禪莫春華池宴清夜高齋眠世道本無得寧復有
忘筌

寄恒璨

心絕去來緣跡順人間事獨尋秋草徑夜宿寒山
寺今日郡齋閑思問楞伽字

簡郡中諸生

守郡卧秋閣四面盡荒山此時聽夜雨孤燈照窗

間藥園日蕪漫書帷長自閒唯當上客至談詩一
解顏

寄全椒山中道士

今朝郡齋冷忽念山中客澗底束荆薪歸來煮白石
欲持一瓢酒遠慰風雨夕落葉滿空山何處尋
行跡

途中寄楊邈裴緒示裛子

上宰領淮右下國屬星馳霧野騰曉騎霜竿裂凍
旗蕭蕭陟連岡莽莽望空陂風截鴈嘹唳雲叅樹
參差高齋明月夜中庭松桂姿當睽一酌恨况此

兩旬期

示全真元常

余辭郡符去爾爲外事牽寧知風雪夜復此對牀
眠始話南池飲更詠西樓篇無將一會易歲月坐
推遷

因省風俗與從姪成緒遊山水中道先歸
寄示

累宵同燕酌十舍攜征騎始造雙林寂遐搜洞府
秘群峰繞盤鬱懸泉仰特異陰壑雲松埋陽崖煙
花媚每慮觀省牽中乖遊踐志我尚山水行子歸

棲息地一操臨流袂上聳干雲轡獨往倦危途懷
冲寡幽致賴爾還都期方將登樓遲

歲日寄京師諸季端武等

獻歲抱深惻僑居念歸緣常患親愛離始覺世務
牽少事河陽府晚守淮南壩平生幾會散已及蹉
跎年昨日罷符竹家貧遂留連部曲多已去車馬
不復全閑將酒爲偶默以道自詮聽訟南嶺寺見
月西澗泉爲政無異術當責豈望遷終理來時裝
歸鑿杜陵田

簡盧陟

可憐白雪曲未遇知音人恓惶戎旅下蹉跎淮海
濱澗樹含朝雨山鳥弄餘春我有一瓢酒可以慰
風塵

西澗即事示盧陟

寢扉臨碧澗晨起淡忘情空林細雨至圓文遍水
生永日無餘事山中伐木聲知子塵喧久暫可散
煩纓

發郡寄京師諸季淮南子弟

始罷永陽守復卧潯陽樓懸檻飄寒雨危堞浸江
流迨茲聞鴈夜重憶別離秋徒有盈樽酒鎮此百

端憂

寄黃劉二尊師

廬山兩道士各在一峰居矯掌白雲表晞髮陽和
初清夜降真侶焚香滿空虛中有無爲樂自然與
世疎道尊不可屈符守豈暇餘高齋遙致敬願示
一編書

贈丘員外

高詞棄浮靡貞行表鄉閭未真南宮拜聊偃東山
居大藩本多事日與文章疎每一覩之子高詠遂
起予宵晝方連燕煩惱亦頓怯格言雅誨闕善謔
矜數餘久跼思遊曠窮慘遇陽舒虎丘愜登眺吳
門悵躊躇方此戀攜手豈云還舊墟告諸吳子弟
文學爲何如

贈李判官

良玉定爲寶長材時所希佐幕方巡郡奏命布恩
威食蔬程獨守飲水節靡違決獄興邦頌高文稟
天機賓館在林表望山啓西扉下有千畝田泱泱
吳土肥始耕已見獲衿絺今授衣政拙勞詳省淹
留未得歸雖慙且忻願日夕覩光輝

寄皎然上人

吳興老釋子野雪蓋精廬詩名徒自振道心長晏
如想茲棲禪夜見月東峰初鳴鐘驚巖壑焚香滿
空虛叨慕端成舊未識豈爲疎願以碧雲思方君
怨別餘茂苑文華地流水古僧居何當一遊詠倚
閣吟躊躇

復理西齋寄丘員外

前歲理西齋得與君子同迨茲已一周悵望臨春
風始自疎林竹還復長榛叢端正良難久蕪穢易
爲功援斧開衆鬱如師啓群蒙庭宇還清曠煩抱
亦舒通海隅雨雪霽春序風景融時物方如故懷
賢思無窮

和張舍人夜直中書寄吏部劉員外

西垣草詔罷南宮憶上才月臨蘭殿出涼自鳳池
來松桂生丹禁鴛鴦集雲臺托身各有所相望徒
徘徊

贈上方僧

見月出東山上方高處禪空林無宿火獨夜汲寒
泉不下藍溪寺今年三十年

送李十四山東遊

聖朝有遺逸披膽謁至尊豈是留榮寵誓將救元

元權豪非所便書奏寢禁門高歌長安酒忠憤不
可吞歟來客河落日與靜者論濟世翻小事丹砂
駐精魂東遊無復繫梁楚多大蕃高論動侯伯疎
懷脫塵喧送君都門野飲我林中尊立馬望東道
白雲滿梁園踟躕欲何贈空是平生言

送閻案赴東川辟

冰炭俱可懷孰云熱與寒何如結髮友不得攜手
歡晨登嚴霜野送子天一端祇承簡書命俯仰豸
角冠上陟白雲嶠下冥玄壑湍離群自有託歷險
得所安當念返窮巷登朝成慨歎

送令狐岫宰恩陽

大雪天地閉群山夜來晴居家猶苦寒子有千里
行行行安得辭荷此蒲璧榮賢豪爭追攀飲餞出
西京樽酒豈不歡暮春自有程離人起視日僕御
促前征逶遲歲已窮當造巴子城和氣被草木江
水日夜清從來知善政離別慰友生

送馮著受李廣州署爲錄事

鬱鬱楊柳枝蕭蕭征馬悲送君灞陵岸糾郡南海
湄名在翰墨場群公正追隨如何從此去千里萬
里期大海吞東南橫嶺隔地維建邦臨日域溫燠

御四時百國共臻奏珍奇獻京師富豪虞興戎繩
墨不易持州伯荷天寵還當胡丹墀子爲門下生
終始豈見遺所願酌貪泉心不爲磷緇上將翫國
士下以報渴飢

喜於廣陵拜覲家兄奉送發還池州

青青連枝樹苒苒久別離客遊廣陵中俱到若有
期俯仰叙存沒哀腸發酸悲收情且爲歡累日不
知飢夙駕多所迫復當還歸池長安三千里歲晏
獨何爲南出登閭門驚飈左右吹所別諒非遠要
令心不怡

餞雍聿之潞州謁李中丞

鬱鬱兩相遇出門草青青酒酣拔劍舞慷慨送子
行驅馬涉大河日暮懷洛京前登太行路志士亦
未平薄遊五府都高步振英聲主人才且賢重士
百金輕絲竹促飛觴夜讌達晨星娛樂易淹暮諒
在執高情

上東門會送李幼舉南遊徐方

離絃既罷彈樽酒亦已闌聽我歌一曲南徐在雲
端雲端雖云邈行路本非難諸侯皆愛才公子遠
結歡濟濟都門宴將去復盤桓令姿何昂昂良馬

遠遊冠意氣且爲別由來非所歎

送洛陽韓丞東遊

仙鳥何飄飄綠衣翠爲襟顧我差池羽咬咬懷好
音徘徊洛陽中遊戲清川淨神交不在結歡愛自
中心駕言忽徂征雲路邈且深朝遊尚同啄夕息
當異林出餞宿東郊列筵屬城陰舉酒欲爲樂憂
懷方沉沉

送鄭長源

少年一相見飛轡河洛間歡遊不知罷中路忽言
還泠泠鷓絃哀悄悄冬夜閑丈夫雖耿介遠別多
苦顏君行拜高堂速駕難久攀鷄鳴儔侶發朔雪
滿河關須臾在今夕斟酌且循環

送李儋

別離何從生乃在親愛中反念行路子拂衣自西
東日昃不留宴嚴車出崇墉行遊非所樂端憂道
未通春野百卉發清川思無窮芳時坐離散世事
誰可同歸當掩重關默默想音容

留別洛京親友

握手出都門駕言適京師豈不懷舊廬惆悵與子
辭麗日坐高閣清觴讌華池昨遊倏已過後遇良

未知念結路方永歲陰野無暉單車我當前暮雪
子獨歸臨流一相望零淚忽沾衣

天長寺上方別子西有道

假邑非拙素况乃別伊人聊登釋氏居攜手戀茲
晨高曠出塵表逍遙滌心神青山對芳苑列樹繞
通津車馬無時絕行子倦風塵今當遵往路佇立
欲何申唯持貞白志以慰心所親

贈別河南李功曹

耿耿抱私戚寥寥獨掩扉臨觴自不飲况與故人
違故人方琢磨環朗代所稀憲禮更右職文翰灑
天機聿來自東山群彥仰餘輝談笑取高第綰綬
即言歸洛都遊燕地千里及芳菲今朝章臺別楊
柳亦依依雲霞未改色山川猶夕暉忽復不相見
心思亂霏霏

宴別幼遐與君貺兄弟

乖闕意方弭安知忽來翔累日重歡宴一旦復離
傷置酒慰茲夕秉燭坐華堂契闊未及展晨星出
東方征人慘已辭車馬儼成裝我懷自無歡原埜
滿春光羣水含時澤野雉鳴朝陽平生有壯志不
覺淚沾裳况自守空宇日夕但彷徨

送宣州周錄事

清時重儒士，糾郡屬伊人。薄遊長安中，始得一交親。
英豪若雲集，餞別塞城闈。高駕臨長路，日夕起風塵。
方念清宵宴，已度芳林春。從茲一分手，緬邈吳與秦。
但覩年運駛，安知後會因。唯當存令德，可
以解惰勤。

謝樂陽令歸西郊贈別諸友生

結髮仕州縣，蹉跎在文墨。徒有排雲心，何由生羽翼。
幸遭明盛日，萬物蒙生植。獨此抱微疴，頽然謝斯職。
世道方荏苒，郊園思偃息。爲歡日已延，君子情未極。
馳觴忽云晏，高論良難測。遊步清都宮，迎風嘉樹側。
晨起西郊道，原野分黍稷。自樂陶唐人，服勤在微力。
佇君列丹陛，出處兩爲得。

送端東行

世承清白遺，躬服古人言。從官俱守道，歸來共閉門。
驅車何處去，暮雪滿平原。

始除尚書郎別善福精舍

簡略非世器，委身同草木。逍遙精舍居，飲酒自爲足。
累日曾一櫛，對書常懶讀。社臘會高年，山川恣遊矚。
明世方選士，中朝懸美祿。除書忽到門，冠帶

便拘束愧忝郎署跡謬蒙君子錄俯仰垂華纓飄
颻翔輕轂行將親愛別戀此西澗曲遠風明夕川
夏雨生衆綠迅風飄野路回首不遑宿明晨下煙
閣白雲在幽谷

送郝詹事

聖朝列群彥穆穆佐休明君子獨至止懸車守國
程忠良信舊德文學播英聲既獲天爵美况將齒
位并書奏蒙省察命駕乃東征皇恩賜印綬歸爲
田里榮朝野同稱嘆園綺鬱齊名長衢軒蓋集飲
餞出西京時屬春陽節草木已含英洛川當盛宴
斯焉爲達生

送蘇評事

季弟仕譙都元兄坐蘭省言訪始欣欣念離當耿
耿嵯峨夏雲起迢遰山川永登高望去塵紛思終
難整

送李侍御益赴幽州幕

二十揮篇翰三十窮典墳辟書五府至名爲四海
聞始從車騎幕今赴嫖姚軍契闊晚相遇草感遽
離群悠悠行子遠眇眇川塗分登高望燕代日夕
生夏雲司徒擁精甲誓將除國氛儒生幸持斧可

以佐功勳無言羽書急坐闕相斯文

自尚書郎出爲滁州刺史

諸別親友兼示弟

少年不遠仕秉笏東西京中歲守淮郡奉命乃征
行素慙省閣姿况忝符竹榮効愚方此始顧私豈
獲并徘徊親交戀愴恨昆友情日暮風雪起我去
子還城登塗建隼旗勒駕望承明雲臺煥中天龍
闕鬱上征晨興奉早朝玉露霑華纓一朝從此去
服膺理庶眊皇恩儻歲月歸復厠羣英

送元錫楊凌

荒林翳山郭積水成秋晦端居意自違况別親與
愛歡筵慊未足離燈悄已對還當掩郡閣佇君方
此會

送楊氏女

永日方慊慊出門復悠悠女子今有行大江沂輕
舟爾輩况無恃撫念益慈柔幼爲長所育兩別泣
不休對此結中腸義往難復留自小闕內訓事姑
貽我憂賴茲託令門仁恤庶無尤貧儉誠所尚資
從豈待周孝恭遵婦道容止順其猷別離在今晨
見爾當何秋居閒始自遣臨感忽難收歸來視幼
女零淚緣纓流

送中弟

秋風入疎戶，離人起晨朝。山郡多風雨，西樓更蕭條。
嗟予淮海老，送子關河遙。同來不同去，沉憂寧復消。

寄別李儋

首戴惠文冠，心有決勝籌。翩翩四五騎，結束向并州。
名在相公幕，丘山恩未酬。妻子不及顧，親友安得留。
夙昔同文翰，交分共綢繆。忽枉別離札，涕淚一交流。
遠郡卧殘雨，涼氣滿西樓。想子臨長路，時當淮海秋。

送丘員外還山

長棲白雲表，暫訪高齋宿。還辭郡邑喧，歸泛松江渌。
結茅隱蒼嶺，伐薪響深谷。同是山中人，不知往來躅。
靈芝非庭草，遼鶴委池鶩。終當署里門，一表高陽族。

重送丘二十二還臨平山居

歲中始再覲，方來又解攜。纔留野艇語，已憶故山棲。
幽澗人夜汲，深林鳥長啼。還持郡齋酒，慰子霜露淒。

送鄭端公弟移院常州

時瞻憲臣重禮爲內兄全公程儻見責私愛信不
憊況昔陪朝列今茲俱海壖清觴方對酌天書忽
告遷豈徒咫尺地使我心思縣應當自此始歸拜
雲臺前

送陸侍御還越

居藩久不樂遇子聊一欣英聲頗籍甚交辟乃時
珍繡衣過舊里驄馬輝四鄰敬恭尊郡守賤簡具
州民謬忝誠所媿思懷方見申置榻宿清夜加籩
饌良辰遵途還盛府行舫繞長津自有賢方伯得
此文翰賓

送崔叔清遊越

忘茲適越意愛我郡齋幽野情豈好謁詩興一相
留遠水帶寒樹閭門望去舟方伯憐文士無爲成
滯遊

送雲陽鄒儒立少府侍奉還京師

建中即藩守天寶爲侍臣歷觀兩都士多閱諸侯
人鄒生乃後來英俊亦罕倫爲文頗瓌麗稟度自
貞醇甲科催令名延閣播芳塵再命趨王畿請告
奉慈親一鍾信榮祿可以展歡欣昆弟俱時秀長
衢當自伸聊從郡閣暇美此時景新方將極娛宴

已復及離辰省署慙再入江海繇十春今日閭門
路握手子歸秦

送豆盧策秀才

歲交冰未泮地卑海氣昏子有京師遊始發吳閭
門新黃含遠林微綠生陳根詩人感時節行道當
憂煩古來濩落者俱不事田園文如金石韻豈乏
知音言方辭郡齋榻爲酌離亭罇無爲倦羈旅一
去高飛翻

送劉評事

聲華滿京洛藻翰發陽春未遂鷓鴻舉尚爲江海
賓吳中高宴罷西上一遊秦已想函關道遊子冒
風塵籠禽羨歸翼遠守懷交親况復歲云暮凜凜
冰霜辰旭霽開郡閣寵餞集文人洞庭摘朱實松
江獻白鱗丈夫豈恨別一酌且歡忻

送雷監赴闕庭

才大無不備出入爲時須雄藩精理行秘府擢文
儒詔書忽已至焉得久踟躕方舟趁朝謁觀者盈
路衢廣筵列衆賓送爵無停迂攀餞誠愴恨賀榮
且歡娛長陪栢梁宴日向丹墀趨時方重右職蹉
跎獨海隅

酬盧嵩秋夜見寄五韻

喬木生夜涼月華滿前墀去君咫尺地勞君千里
思素秉棲遁志况貽招隱詩坐見林木榮願赴滄
洲期何能待歲晏攜手當此時

酬鄭戶曹驪山感懷

蒼山何鬱盤飛閣凌上清先帝昔好道下元朝百
靈白雲已蕭條麋鹿但縱橫泉水今尚暖舊林亦
青青我念綺襦歲扈從當太平小臣職前驅馳道
出灞亭翻翻日月旗殷殷鞀鼓聲萬馬自騰驤八
駿按轡行日出煙嶠綠氛氲麗層甍登臨起遐想
沐浴懽聖情朝燕詠無事時豐賀國禎日和絃管
音下使萬室聽海內溱朝貢賢愚共歡榮合沓車
馬喧西聞長安城事往世如寄感深迹所經申章
報蘭藻一望雙涕零

酬李儋

開門臨廣陌旭日車駕喧不見同心友徘徊憂且
煩都城二十里居在良與坤人生所各務乖闊累
朝昏湛湛樽中酒青青芳樹園緘情未及發先此
枉璵璠邁世超高躅尋流得真源明當策疲馬與
子同笑言

酬元偉過洛陽夜燕

三載寄關東所懽皆遠違思懷方耿耿忽得觀容
輝親燕在良夜歡攜闕中圍問我猶杜門不能奮
高飛明燈照四隅炎岸正可依清觴雖云酌所媿
乏珍肥晨裝復當行寥落星已稀何以慰心曲佇
子西還歸

酬韓質舟行阻凍

晨坐枉嘉藻持此慰寢興中獲辛苦奏長河結陰
冰皓曜群玉發淒清孤景凝至柔反成堅造化安
可恒方舟未得行鑿飲空競競苦寒彌時節待泮
豈所能何必涉廣川荒衢且升騰殷勤宣中意庶
用達吾朋

李博士弟以余罷官居同德精舍共有伊
陸名山之期久而未去在詩見問中云宋
生昔登覽末云那能顧蓬蓽直書鄙懷聊
以爲答

初夏息衆緣雙林對禪客往茲芳蘭藻促我幽人
策冥搜全前哲逸句陳往迹髣髴陸渾南迢遞千
峰碧從來遲高駕自顧無物役山水心所娛如何
更朝夕晨興涉清洛訪子高陽宅莫言往來疎駕

馬知阡陌

荅李博士

休沐去人遠高齋出林杪晴山多碧峰顥氣疑秋
曉端居喜良友在使千里路緘書當夏時開緘時
已度簷雛已飄颺荷露方蕭颯夢遠竹窗幽行稀
蘭徑合舊居共南北往來只如昨問君今爲誰日
夕度清洛

荅劉西曹

公館夜云寂微涼羣樹秋西曹得時彥華月共淹
留長嘯舉清觴志氣誰與儔千齡事雖邈俯念忽
已周篇翰如雲興京洛頗優游詮文不獨古理妙
即同流淺劣見推許恐爲識者尤空慙文璧贈日
夕不能酬

荅貢士黎逢

茂等方上達諸生安可希栖神澹物表渙汗布令
詞如彼崑山玉本自有光輝鄙人徒區區稱嘆亦
何爲彌月曠不接公門但驅馳蘭章忽有贈持用
慰所思不見心尚密况當相見時

荅韓庫部

良玉表貞度麗藻頗爲工名列金閨籍心與素士

章魚州詩集
同日晏下朝來車馬自生風清宵有佳興皓月直
南宮矯翮方上征顧我邈忡忡不願攀舉執事
府庭中智乖時亦蹇才大命有通還當以道推解
組守蒿蓬

荅崔主簿倬

朗月分林靄遙管動離聲故驩良已阻空宇澹無
情窈窕雲鴈沒蒼茫河漢橫蘭章不可荅冲襟徒
自盈

荅徐秀才

鈇鈍謝貞器時秀猥見稱豈如白玉仙方與紫霞

升清詩舞艷雪孤抱瑩玄冰一枝非所貴懷書思
武陵

荅長寧令楊轍

皓月升林表公堂滿清輝嘉賓自遠至觴飲夜何
其宰邑視京縣歸來無寸資瓌文溢衆寶雅正得
吾師廣川含澄瀾茂樹擢華滋短才何足數枉贈
媿妍詞歡晤良見屬素懷亦已披何意雲栖翰不
嫌蓬艾卑但恐河漢没回車首路岐

荅馮魯秀才

晨坐枉瓊藻知子返中林淡然山景晏泉谷響幽

禽髣髴謝塵跡逍遙舒道心顧我腰間綬端爲華
髮侵簿書勞應對篇翰曠不尋薄田失鋤耨生苗
安可任徒令慙所問想望東山岑

荅崔主簿問兼簡溫上人

緣情生衆累晚悟依道流諸境一已寂了將身世
浮閑居澹無味忽復四時周靡靡芳草積稍稍新
篔抽即此抱餘素塊然誠寡伴自適一忻意愧蒙
君子憂

清都觀荅幼遐

逍遙仙家子日夕朝玉皇興高靑露沒渴飲瓊華
漿解組一來欵披衣拂天香粲然顧我笑綠簡發
新章泠泠如玉音馥馥若蘭芳浩意坐盈此月華
殊未央却念誼譁日何由得清涼疏松抗高殿密
竹陰長廊榮名等糞土攜手隨風翔

善福精舍荅韓司錄清都觀會宴見憶

弱志厭衆紛抱素寄精廬皦皦仰時念悶悶獨爲
愚之子亦辭秩高蹤罷馳驅忽因西飛禽贈我以
瓊琚始表仙都集復言歡樂殊人生各有因契闊
不獲俱一來田野中日與人事疎水木澄秋景逍
遙清賞餘在駕懷前諾引領豈斯須無爲便高翔

邈矣不可迂

答長安丞裴稅

出身忝時士於世本無機爰以林壑趣遂成頑鈍
姿臨流意已淒采菊露未晞舉頭見秋山萬事都
若遺獨踐幽人蹤邈將親友違髦士佐京邑懷念
枉貞詞久雨積幽抱清樽宴良知從容操劇務文
翰方見推安能戢羽翼顧此林栖時

奉酬處士叔見示

掛纓守貧賤積雪卧郊園叔父親降趾壺觴攜到
門高齋樂燕罷清夜道心存即此同疎氏可以一

忘言

答庫部韓郎中

高士不羈世頗將榮辱齊適委華冕去欲還幽林
栖雖懷承明戀欣與物累睽逍遙觀運流誰復識
端倪而我豈高致偃息平門西愚者世所遺沮溺
共耕犁風雪積深夜園田掩荒蹊幸蒙相思札歛
曲期見攜

答暢校書當

偶然弃官去投跡在田中日出照茅屋園林養愚
蒙雖云無一資樽酌會不空且欣百穀成仰歎造

化功出入與民伍作事靡不同時伐南澗竹夜還
澧水東貧蹇自成退豈爲高人蹤覽君金玉篇彩
色發我容日日欲爲報方春已徂冬

澧上精舍荅趙氏外生伉

遠跡出塵表寓身雙樹林如何小子伉亦有超世
心擔書從我遊攜手廣川陰雲開夏郊綠景晏青
山沉對榻遇清夜獻詩合雅音所推苟禮數於性
道豈深隱拙在冲默經世昧古今無爲率爾言可
以致華簪

荅端

郊園夏雨歇閑院綠陰生職事方無效幽賞獨違
情物色坐如見離抱悵多盈况感夕涼氣聞此亂
蟬鳴

荅王郎中

卧閣枉芳藻覽旨悵秋晨守郡猶羈寓無以慰嘉
賓野曠歸雲盡天清曉露新池荷涼已至窗梧落
漸頻風物殊京國邑里但荒榛賦繁屬軍興政拙
媿斯人髦士久臺閣中路一漂淪歸當列聖朝豈
念卧淮濱

荅崔都水

亭亭心中人迢迢居秦關常緘素札去適在華章
還憶在澧郊時攜手望秋山久嫌官府勞初喜罷
秩閑終年不事業寢食長慵頑不知爲時來名籍
掛郎間攝衣辭田里華簪耀頽顏卜居又依仁日
夕正追攀牧人本無術命至苟復遷離念積歲序
歸途眇山川郡齋有佳月園林含清泉同心不在
宴樽酒徒盈前覽君陳迹遊詞意俱悽妍忽忽已
終日將酬不能宣毗稅况重疊公門極熬煎責逋
甘首免歲晏當歸田勿厭守窮轍慎爲名所牽

荅裴丞說歸京所獻

執事頗勤久行去亦傷乖家貧無僮僕吏卒升寢
齋衣服藏內篋藥草曝前階誰復知次第濩落且
安排還期在歲晏何以慰吾懷

荅裴處士

遺民愛精舍乘犢入青山來署高陽里不遇白衣
還禮賢方化俗聞風自歛關况子逸群士栖息蓬
蒿間

荅楊奉禮

多病守山郡自得接嘉賓不見三四日曠若十餘
旬臨觴獨無味對榻已生塵一詠舟中作灑雪忽

驚新煙波見樓旅景物具昭陳秋塘唯落葉野寺
不逢人白事廷吏簡閑居文墨親高天池閣靜寒
菊霜露頻應當整孤棹歸來展殷勤

荅僦奴重陽二甥

弃職曾守拙翫幽遂忘喧山澗依磽堦竹樹蔭清
源貧居煙火濕歲熟黎棗繁風雨飄茅屋蒿草沒
瓜園群屬相歡悅不覺過朝昏有時看禾黍落日
上秋原飲酒任真性揮筆肆狂言一朝黍蘭省三
載居遠藩復與諸弟子篇翰每相敦西園休習射
南池對芳樽山藥經雨碧海榴凌霜翻念爾不同
此悵然復一論重陽守故家僦子旅湘沅俱有緘
中藻惻惻動離魂不知何日見衣上淚空存

荅重陽

省劄陳往事愴憶數年中一身朝北闕家累守田
農望山亦臨水暇日每來同性情一疎散園林多
清風忽復隔淮海夢想在澧東病來經時節起見
秋塘空城郭連榛嶺鳥雀噪溝叢坐使驚霜鬢撩
亂已如蓬

酬劉侍郎使君

瓊樹凌霜雪蔥蒨如芳春英賢雖出守本自玉階

人宿昔陪郎署出入仰清塵孰云俱列郡比德豈
爲鄰風雨飄海氣清涼悅心神重門深夏晝賦詩
延衆賓方以歲月舊每蒙君子親繼作郡齋什遠
贈荆山珍高閑庶務理遊眺景物新朋友亦遠集
燕酌在佳辰始唱已慙拙將酬益難伸濡毫意僊
勉一用寫悃勤

荅令狐侍郎

一凶乃一吉一是復一非孰能逃斯理亮在識其
微三黜故無愠高賢當庶幾但以親交戀音容邈
難希况惜別離久俱忻藩守歸朝宴方陪廁山川
又乖違吳門冒海霧峽路凌連磯同會在京國相
望涕沾衣明時重英才當復列彤闈白玉雖塵垢
拂拭還光輝

酬張協律

昔人鬻春地今人復一賢屬余藩守日方君卧病
年麗思阻文宴芳蹤闕賓筵經時豈不懷欲往事
屢牽公府適煩倦開緘瑩新篇非將握中寶何以
比其妍感茲棲寓詞想復痾瘵纏空宇風霜交幽
居情思綿當以貧非病孰云白未玄邑中有其人
憔悴即我愆由來牧守重英俊得薦延匪人等鴻

毛斯道何由宣遭時無早晚蘊器俟良緣觀文心
未衰勿藥疾當痊晨期簡牘罷馳慰子冲然

奉和聖製重陽日賜宴

聖心憂萬國端居在穆清玄功致海晏錫讌表文
明恩屬重陽節雨應此時晴寒菊生池苑高樹出
宮城捧藻千官處垂戒百王程復覩開元日臣愚
獻頌聲

和吳舍人早春歸沐西亭言志

曉漏戒中禁清香肅朝衣一門雙掌誥伯侍仲言
歸亭高性情曠職密交遊稀賦詩樂無事解帶偃
南扉陽春美時澤旭霽望山暉幽禽響未轉東原
緣猶微名雖列仙爵心已遣塵機即事同巖隱聖
渥良難違

答河南李士弼題香山寺

洛都游宦日少年攜手行投杯起芳席總轡振華
纓關塞有佳氣巖開伊水清攀林憇佛寺登高望
都城蹉跎二十載世務各所營茲賞長在夢故人
安得并前歲守九江恩召赴咸京因塗再登歷山
河屬晴明寂寞僧侶少蒼茫林木成墻宇或崩剝
不見舊題名舊遊况存歿獨此淚交橫交橫誰與

同書辟貽友生今茲守吳郡綿思方未平子復經
陳迹一感我深情遠蒙惻愴篇中有金玉聲反覆
終難荅金玉尚爲輕

荅故人見諭

素寡名利心自非周圓器徒以歲月資屢蒙藩條
寄時風重書札物情敦貨遺機杼十縑單慵疎百
函愧常負交親責且爲一官累况本濩落人歸無
置錐地省已已知非枉書見深致雖欲効區區何
由枉其志

酬閻員外陟

寒夜阻良覲叢竹想幽居虎符予已誤金丹子何
如讌集觀農暇笙歌聽訟餘雖蒙一言教自愧道
情疎

長安遇馮著

客從東方來衣上灞陵雨問客何爲來采山因買
斧冥冥花正開颺颺鷺新乳昨別今已春鬢絲生
幾縷

廣陵遇孟九雲卿

雄藩本帝都遊士多俊賢夾河樹鬱鬱華館千里
連新知雖滿堂中意頗未宣忽逢翰林友歡樂十

酒前高文激頽波四海靡不傳西施且一笑衆女
安得妍明月滿淮海哀鴻逝長天所念京國遠我
來君欲還

逢楊開府

少事武皇帝無賴恃恩私身作里中橫家藏亡命
兒朝持樗蒲局暮竊東鄰姬司隸不敢捕立在白
玉墀驪山風雪夜長楊羽獵時一字都不識飲酒
肆頑癡武皇升仙去憔悴被人欺讀書事已晚把
筆學題詩兩府始收跡南宮謬見推非才果不容
出守撫惲嫠忽逢楊開府論舊涕俱垂坐客何由
識唯有故人知

有所思

借問堤上柳青青爲誰春空遊昨日地不見昨日
人繚繞萬家井往來車馬塵莫道無相識要非心
所親

暮相思

朝出自不還暮歸花盡發豈無終日會惜此花間
月空館忽相思微鍾坐來歇

夏夜憶盧嵩

靄靄高館暮開軒滌煩襟不知湘雨來蕭灑在幽

林炎月得涼夜芳樽誰與斟故人南北居累月間
微音人生無閑日歡會當在今反側候天日層城
苦沉沉

春中憶元二

雨歇萬井春柔條已含綠徘徊洛陽陌惆悵杜陵
曲遊絲正高下啼鳥還斷續有酒今不同思君瑩
如玉

懷素友子西

廣陌並遊騎公堂接華襟方歡遽見明永日獨沉
吟階暝流暗駛氣疎露已侵層城湛深夜片月生
幽林往歎良未遂來覲曠無音恒當清觴宴思子
玉山岑耿耿何以寫密言空委心

月晦憶去年與親友曲水遊讌

晦賞念前歲京國結良儔騎出宣平里飲對曲池
流今朝隔天末空園傷獨遊雨歇林光變塘綠鳥
聲幽凋忙積逋稅華鬢集新秋誰言戀虎符終當
還舊丘

池上懷王卿

幽居捐世事佳雨散園芳入門靄已綠水禽鳴春
塘重雲始成夕忽霽尚殘陽輕舟因風泛郡閣望

蒼蒼私燕阻外好臨歡一停觴茲遊無時盡旭日
願相將

立夏日憶京師諸弟

改序念芳辰煩襟倦日永夏木已成陰公門晝恒
靜長風始飄閣疊雲纔吐嶺坐想離居人還當惜
徂景

曉至園中憶諸弟崔都水

山郭恒悄悄林月亦娟娟景清神已澄事簡慮絕
牽秋塘徧衰草曉露洗紅蓮不見心所愛茲賞豈
爲妍

雨夜感懷

微雨灑高林塵埃自蕭散耿耿心未平沉沉夜方
半獨驚長簟冷遽覺愁鬢換誰能當此夕不有盈
襟歎

雲陽館懷谷口

清泚階下流云自谷口源念昔白衣士結廬在石
門道高杳無累景靜得忘言山夕綠陰滿世移清
賞存吏役豈遑暇幽懷復朝昏雲泉非所濯蘿月
不可援長往遂真性暫遊恨卑喧出身既事世高
躅難等論

憶澧上幽居

一來當復去猶此厭攀籠况我林栖子朝服坐南宮唯獨問啼鳥還如澧水東

重陽登滁城樓憶前歲九日歸澧上赴崔都水及諸弟燕集悽然懷舊

今日重九讌去歲在京師聊迴出省步一赴郊園期嘉節始云邁周辰已及茲秋山滿清景當賞屬乖離凋散民里闕摧翳衆木哀樓中一長嘯惻愴起涼颼

始夏南園思舊里

夏首雲物變雨餘草木繁池荷初帖水林花已掃園繁叢蝶尚亂依閣鳥猶喧對此殘芳月憶在漢陵原

登蒲塘驛公路見泉谷邨墅忽想京師舊居追憶昔年

青山道騎遶春風行旆舒均徭視屬城問疾躬里閭煙水依泉谷川陸散樵漁忽念故園日復憶驪山居荏苒斑鬢及夢寢婚宦初不覺平生事咄嗟二紀餘存沒闊已永悲多歡自疎高秩非爲美闌干淚盈裾

經函谷關

洪河絕山根單軌出其側萬古爲要樞往來何時
息秦皇既恃險海內被吞食及嗣同覆顛咽喉莫
能塞炎靈詎西駕婁子非經國徒欲扼諸侯不知
恢至德聖朝及天寶豺虎起東北下沉戰死魂上
結窮冤色古今雖共守成敗良可識藩屏無俊賢
金湯獨何力馳車一登眺感慨中自惻

經武功舊宅

茲邑昔所遊嘉會常在目歷載俄二九始往今來
復慼慼居人少茫茫埜田綠風雨經舊墟毀垣迷
往躅門臨川流駛樹有羈雌宿多累恒悲往長年
覺時速欲去中復畱徘徊結心曲

往雲門郊居塗經迴流作

茲晨迺休暇適往田家廬原谷徑塗澁春陽草木
敷纔遵板橋曲復此清澗紆崩壑方見射迴流忽
已舒明滅泛孤景杳靄含夕虛無將爲邑志一酌
澄波餘

乘月過西郊渡

遠山含紫氛春埜靄云暮值此歸時月畱連西澗
渡謬當文墨會得與羣英遇賞逐亂流翻心將清

景悟行車儼未轉芳草空盈步已舉候亭火猶愛
邨原樹還當守故局悵恨乖幽素

晚歸澧川

凌霧朝闔闔落日返清川簪組方暫解臨水一條
然昆弟欣來集童稚滿眼前適意在無事攜手望
秋田南嶺橫爽氣高林繞遙阡野廬不鋤理翳翳
起荒煙名秩斯逾分廉退媿不全已想平門路晨
騎復言旋

授衣還田里

公門懸甲令澣濯遂其私晨起懷愴恨野田寒露
時氣收天地廣風淒草木衰山明始重疊川淺更
逶迤煙火生閭里禾黍積東菑終焉可樂業時節
一來斯

夕次盱眙縣

落帆逗淮鎮停舫臨孤驛浩浩風起波冥冥日沉
夕人歸山郭暗鴈下蘆洲白獨夜憶秦關聽鐘未
眠客

春月觀省屬城始憇東西林精舍

因時省風俗布惠迨高年建隼出潯陽整駕遊山
川白雲歛晴壑群峰列遙天嶽崎石門狀杳靄香

爐煙榛荒屢罨罍逼側殆覆顛方臻釋氏廬時物
屢華妍曇遠昔經始於茲悶幽玄東西竹林寺灌
注寒澗泉人事既云泯歲月復已緜殿宇餘丹紺
磴閣峭欹懸佳士亦棲息善身絕塵緣今我蒙朝
寄教化敷里鄺道妙苟爲得出處理無徧心當同
所尚跡豈辭纏牽

自蒲塘驛迴駕經歷山水

館宿風雨滯始晴行蓋轉潯陽山水多草木俱紛
衍崎嶇緣碧澗蒼翠踐苔蘚高樹夾潺湲崩石橫
陰巘埜杏依寒折餘雲冒嵐淺性愜形豈勞境殊
路遺緬憶昔終南下佳遊亦屢展時禽下流暮紛
思何由遣

山行積雨歸途始霽

攬轡窮登降陰雨遘二旬但見白雲合不睹巖中
春急澗豈易揭峻塗良難遵深林猿聲冷沮洳虎
跡新始霽升陽景山水閱清晨雜花積如霧百卉
萋已陳鳴騶屢驤首歸路自欣欣

傷逝

染白一爲黑焚木盡成灰念我室中人逝去亦不
迴結髮二十載賓敬如初來提攜屬時屯契闊憂

患災柔素亮爲表禮章夙所該仕公不及私百事
委令才一日入閨門四壁滿塵埃斯人既已矣觸
物但傷摧單居移時節泣涕撫嬰孩知妄謂當遣
臨感要難裁夢想忽如睹驚起復徘徊此心良無
已遠屋生蒿萊

往富平傷懷

晨起凌嚴霜慟哭臨素帷駕言百里塗惻愴復何
爲昨者仕公府屬城常載馳出門無所憂返室亦
熙熙今者掩筠扉但聞童稚悲丈夫須出入顧爾
內無依銜恨已酸骨何況苦寒時單車路蕭條迴

首長透遲飄風忽截野嘹唳鴈起飛昔時同往路
獨往今詎知

出還

昔出喜還家今還獨傷意入室掩無光銜哀寫虛
位悽悽動幽幔寂寂驚寒吹幼女復何知時來庭
下戲咨嗟日復老錯莫身如寄家人勸我食對案
空垂淚

冬夜

杳杳日云夕鬱結誰爲開單衾自不暖霜霰已皚
皚晚歲淪夙志驚鴻感深哀深哀當何爲桃李忽

凋摧帷帳徒自設冥冥豈復來平生雖恩重遷去
托窮埃抱此女曹恨顧非高世才振衣中夜起河
漢尚徘徊

送終

奄忽逾時節日月獲其良蕭蕭車馬悲祖載發中
堂生平同此居一旦異存亡斯須亦何益終復委
山岡行出國南門南望鬱蒼蒼日入乃云造慟哭
宿風霜晨遷俯玄廬臨訣但遑遑方當永潛翳仰
視白日光俯仰遠終畢封樹已荒涼獨留不得還
欲去結中腸童稚知所失啼號捉我裳即事猶倉

卒歲月始難忘

除日

思懷耿如昨季月已云暮忽驚年復新猶恨人成
故冰池始泮綠梅稍還飄素淑景方轉延朝朝自
難度

對芳樹

迢迢芳園樹列映清池曲對此傷人心還如故時
綠風條灑餘靄露葉承新旭佳人不再攀下有往
來躅

月夜

皓月流春城華露積芳草坐念綺窗空翻傷清景
好清景終若斯傷多人自老

歎楊花

空蒙不自定况值暄風度舊賞逐流年新愁忽盈
素纒紫下苑曲稍滿東城路人意有悲歡時芳獨
如故

過昭國里故第

不復見故人一來過故宅物變知景暄心傷覺時
寂池荒埜筠合庭綠幽草積風散花意謝鳥還山
光夕宿昔方同賞詎知今念昔緘室在東廂遺器

不忍覲柔翰全分意芳巾尚染澤殘工委筐篋餘
素經刀尺收此還我家將還復愁惕永絕攜手歡
空存舊行迹冥冥獨無語杳杳將何適唯思今古
同時緩傷與戚

夏日

已謂心苦傷如何日方永無人不晝寢獨坐山中
靜悟澹將遣慮學空庶遺境積俗易爲侵愁來復
難整

端居感懷

沉沉積素抱婉婉屬之子永日獨無言忽驚振衣

起方如在幃室復悟永終已稚子傷恩絕盛時若
流水暄涼同寡趣朗晦俱無理寂性常喻人滯情
今在已空房欲云暮巢鷺亦來止夏木遽成陰綠
苔誰復履感至竟何方幽獨長如此

悲紈扇

非關秋節至詎是恩情改掩嘔人已無委篋涼空
在何言永不發暗使銷光彩

閑齋對雨

幽獨自盈抱陰淡亦連朝空齋對高樹疎雨共蕭
條巢鷺翻泥濕蕙花依砌消端居念往事倏忽苦

驚飈

林園晚霽

雨歇見青山落日照林園山多煙鳥亂林清風景
翻提攜唯子弟蕭散在琴樽同遊不同意耿耿獨
傷魂寂寞鍾已盡如何還入門

秋夜二首

庭樹轉蕭蕭陰蟲還戚戚獨向高齋眠夜聞寒雨
滴微風時動牖殘燈尚留壁惆悵平生懷偏來委
今夕

霜露已淒淒星漢復昭回朔風中夜起驚鴻千里

來蕭條涼葉下寂寞清砧哀歲晏仰空宇心事若
寒灰

感夢

歲月轉蕪漫形影長寂寥髣髴觀微夢感嘆起中
宵綿思靄流月驚魂颯迴飈誰念茲夕永坐令顏
鬢凋

同德精舍舊居傷懷

洛京十載別東林訪舊扉山河不可望存沒意多
違時遷迹在尚同去獨來歸還見窗中鴿日暮遶
庭飛

悲故交

白璧衆求瑕素絲易成汗萬里顛沛還高堂已長
暮積憤方盈抱纏哀忽逾度念子從此終黃泉竟
誰訴一爲時事感豈獨平生故唯見荒丘原埜草
塗朝露

張彭州前與緱氏馮少府各惠寄一篇多
故未荅張已云沒因追哀叙事兼遠簡馮
生

君昔掌文翰四域復石渠朱衣乘白馬輝光照里
閭余時忝南省接讌媿空虛一別守茲郡蹉跎歲

再除長懷關河表永日簡牘餘郡中有方塘涼閣
對紅蕖金玉蒙遠賦篇詠見吹噓未荅平生意已
沒九原居秋風吹寢門長慟涕漣如覆視緘中字
奄爲昔人書髮鬢已云白交友日凋疎馮生遠同
恨顛顛在田廬

東林精舍見故殿中鄭侍御題詩追舊書

情涕泗橫集因寄呈閩澧州馮少府

仲月景氣佳東林一登歷中有故人詩淒涼在高
壁精思長懸世音容已歸寂墨澤傳灑餘磨滅親
翰跡平生忽如夢百事皆成昔結騎京華年揮文
篋笥積朝廷重英彥時輩分珪璧永謝栢梁陪獨
闕金門籍方嬰存沒感豈暇林泉適雨餘山景寒
風散花光夕新知雖滿堂故情誰能覲唯當同時
友緘寄空悽憾

睢陽感懷

豺虎犯天綱昇平無內備長驅陰山卒略踐三河
地張侯本忠烈濟世有深智堅壁梁宋間遠籌吳
楚利窮年方絕輸隣援皆攜貳使者哭其庭救兵
終不至重圍雖可越藩翰諒難弃飢喉待危巢懸
命中路墜甘從鋒刃斃莫奪堅貞志宿將降賊庭

儒生獨全義空城唯白骨同往無賤貴哀哉豈獨
今千載當歔歔

廣德中洛陽作

生長太平日不知太平歡今還洛陽中感此方苦
酸飲藥本攻病毒腸翻自殘王師涉河洛玉石俱
不完時節屢遷斥山河長鬱盤蕭條孤煙絕日入
空城寒蹇劣乏高步緝遺守微官西懷咸陽道躑
躑心不安

感事

霜雪皎素絲何意墜墨池青蒼猶可濯黑色不可
移女工再三歎委弃當此時歲寒雖無褐機杼誰
肯施

感鏡

鑄鏡廣陵市菱花匣中發宿昔嘗許人鏡成人已
沒如冰結圓器類壁無絲髮形影終不臨清光殊
不歇一感平生言松枝掛秋月

歎白髮

還同一葉落對此孤鏡曉絲縷乍難分楊花復相
繞時役人易衰吾年白猶少

天都後學汪立名西亭輯訂

韋蘇州詩集

